

**Ngu jo cjua xi chja
xujun changá tsëhë Nina XI**

Historias del Antiguo Testamento XI
1 Reyes 22: 51 - 2 Reyes 15, Jonás, Amós, Oseas



en el mazateco de Chiquihuitlán de Juárez

Ngu jo cjua xi chja
xujun changá tsähë Nina XI

Historias del Antiguo Testamento XI

1 Reyes 22: 51 - 2 Reyes 15, Jonás, Amós, Oseas



Las ilustraciones son propiedad de la Fundación David C. Cook, usadas con permiso.

**Primera edición
Historias del Antiguo Testamento XI
en el mazateco de Chiquihuitlán de Juárez
México, D. F. .6C
Febrero de 1994**

Historias del Antiguo Testamento XI

Xcusun xi cavatju hya xi cavitexa ngujo quihndi rē Acab nangui Israel, cojo hya xi Eliseo cafaha me cahndē rē profeta Elías

(1 Reyes 22:51-53; 2 Reyes 1-3)

Camá xi Josafat má me xuta xi matitjun tsēhē Judá. Hane Ocozías, quihndi rē Acab casahmi me gobiernu nangui Israel. Hya xi camá ne, cjanengui Ocozías tsēhē ngu cahndē xi hnga hane jemu casacu hmu rē me. Hya xi camá ne, meje cumachaya rē me, há cuma ndaja me o há cueya me. Vēhē xi catsingatju me xuta rē me xi cuinenguise me tsēhē nina ndacha xi siu nangui rē xuta filisteo. Sehe cuitjin cachja Nina cojo profeta Elías:

—Tihin techitehe mosu rē cha matitjun Ocozías. Tinóje cojo mosu rē cha xi caveni tichja cha cojo nina ndacha ta meje rē xi cuinenguise ná cha. Hndē catuya cha catichja cha cojo Ocozías xi ha jemu tacun tiña nixtin xi cueya cha.

Elías ne, cavechutaha me mosu jan ndiya hane casahmi me sacuahha cachja Nina. Hya xi camá ne, cavuya xuta rē Ocozías hane cachja me cojo cha cjua xi casacu rē me, peru hviin me yo xi cachja cjua jan. Peru hya xi cachja me cojo Ocozías ne, me vëhë camachaya rē me xi Elías cachja me cjua jan. Sehe catsingatju me sindadu rē me xi cjue jaha me Elías. Peru xi cavechutaha sindadu Elías ne, cachja Elías cojo me ta: Xtundi ndihi tsëhë ngahnga, hane cuaca nuju, sehe cumachaya nuju xi ngahan ne, cuichjá cjua rē Nina. Hane cuatjin camá sacuahha xi cachja Elías ta catundi ndihi hane cavaca rē yëjë sindadu jan. Hane Ocozías catsingatju nga me ngu cuatjin nga sindadu, hane tangun ni cavatju cha camá. Sehe catsingatju me cha xi quiji majyan ndiya. Hane xi cafehe capitán rē sindadu jan xcun Elías ne, cavixcunhnchi me xcun Elías cafehya me cjuandaja xi tsajin mé sahmi Elías cojo me. Hya xi camá ne, cachja Nina cojo Elías xi cjue me cojo sindadu jan. Hane quiji me cachja me cojo xuta xi matitjun jan xi tacun tiña nixtin xi cueya cha ngatsë rē xi cjua rē nina ndacha cafehya cha xi cumacjain rē cha. Hane cahme jain Ocozías, ta jo nu ni cavitexa cha xuta nangui Israel. Hane tsëhë xi casacuiin rē cha quihndi rē cha ne, ngu cha hntsë cha xi hmi rē Joram camá me xuta xi matitjun.

Xi cavatju hitsë nixtin ne, Nina ne, camameje cjuecojo me Elías ngahnga ngajñi rē ngu tjo vitijnu. Hacuaha hya ne, hacuiin suva tsujyhiya Elías ta cojo Eliseo tsujyhiya me. Nixtin vē ne, cavatju me xi cuacun jan taha ngujo nandya. Hane hora xi cafehe me ndajyē Jordán ne, Elías ne, catsijeyu me tsjian rē me sehe cavaja me xcun nanda. Hya xi camá ne, nanda ne, camá jo cahndē sehe cavatjucja me sacuaha xcun nanguiquixi. Elías ne, ha ndaja vēē me xi xati cjue me cojo Nina, hane Eliseo ne, cuisehen me xa cahndē rē me vēhē, vēhē xi cavinenguise me me mé xi meje rē me xi sahmi Elías ngatsē



rë me xi chaja sa cjue me. Hane Eliseo ne, cachja me xi meje rë me cjuatjo sacuahha cjuatjo xi sacu rë quihndi tjun rë ngu nima. Hane meje rë me xi Hasen rë Nina ne, sua rë me cjuatacun xi sahmi me cjuarcun sacuahha xcusun xi casahmi me cojo Elías. Cachja me xi tangun ni sacuahha xcusun rë xuta vë xi satë rë quihndi tjun jo cahndë rë cjuatjo rë nahmi rë ne, hacuahha meje rë me xi satë rë me jo cahndë rë ngahñu rë Nina xi casatë rë Elías. Sehe cuitjin cachja Elías:

—Cjuatjo xi cachjahye ne, chja sacu ri. Peru Nina sua ri vë sá xi che ná hora xi cjuê.

Hane hya xi tsujyihya ni me, ngu ñahñu ne, cavëë Eliseo ngu carreta tsëhë si xi ndihi camá. Hacuaha naxin xi juvë chu ne, suva ndihi camá chu. Hane carreta vë ne, quijicojo Elías ngahnga ngajñi rë ngu tjo vitijñu. Vëhë xi ngu cjuachan ni quiji Elías. Ngu tu tu ni tsjian xi vatsa me yojo rë me ne, vëhë cavejña ta cjanengui hora xi quijiniji me. Hane Eliseo ne, cafaha me tsjian jan, sehe cavuya quiji me taha ndajyë Jordán. Hane xi cafehe me ndajyë jan ne, cavaja me nanda jan cojo tsjian rë Elías. Hane sehe cachja me cuitjin:



—Quihndë ne, ¿há cumá xi cuisecoo ná Yahvé sacuaha cavisecoo me Elías?

Hane hora vëhë ne, nanda jan ne, camá jo cahndë. Hane cavatjucja Eliseo ndajyë sacuaha nanguiquixi. Hora hya ne,

tivutsejen yahnga profeta mé xi tijima. Hane casahmi profeta jan ngujoyë Eliseo xi tsingatju me xuta xi cjue cuanguise me Elías. Xi má rë profeta jan ne, cumá xi Nina ne, quiji me cojo Elías peru sehe cuejña me me nangui ngu cahndë cjin. Hane casahmi Eliseo sacuaaha xi meje rë me, peru casacuiin rë me Elías ta Nina ne, quijicojo rë me ngahnga.

Nu hya ne, Joram cavitexa cha nangui Israel. Tejo nu casahmi cha gobiernu ngajan. Hacuuiin ndaja xcusun rë cha, peru hitsë ndaja xcusun rë cha xi cumá rë xcusun rë Acab, nima nahmi rë cha. Sacuaaha nina ndacha xi hmi rë Baal, cafaharcuiin cha nina vë. Peru siu nina ndacha xi cafaharcun cha ta cafaharcun cha hndindyaja tsëhë oro. Hya xi camá ne, xuta nangui Moab ne, miji cuechji sa me tujunsa sacuaaha cavechji me hya xi tacun cjuahñu Acab. Hane ngatsë rë tujún jan ne, Joram ne, cafehya me cjuandaja rë Josafat, xuta xi matitjun tsëhë Judá xi cuisecoo me sahmi me si cojo xuta nangui Moab. Hane casahmi me, hacuaaha caca rë me xcun si jan ta Nina cavisecoo me sindadu rë me. Peru me xi matitjun tsëhë Moab ne, xi cavëë me xi ticaain rë sindadu rë me xcun si ne, catsiquehen me quihndi tjun rë me sehe casua me cha sacuaaha ngu cjuatjo tjin

chihin sacuaha xcusun xi sahmi me cojo nina ndacha rē me. Hane tsēhē xi casahmi me xcun xondyojo rē nandya rē me ne, cavēē sindadu ladu Israel cojo Judá mé camá. Sehe jemu choho cama rē me, cafē catsē cjuatsihi xahasen rē me, hane cavuya me ndava me.

Jemu jyē cjuarcun sahmi profeta Eliseo

(2 Reyes 4-5)

Nixtin hya ne, ngajñi rē yējē profeta ngajan nangui Israel ne, cahme ngu me. Hane me vēhē ne, cavuxetaha me tujún. Hane hya xi cahme me, cha xi casua tujún canuxetaha rē jan ne, meje cjuaha cha catsijo quihndi rē nima xi cuma mosu hndixahan rē cha ta tsajin rē me tujún xi tsicuya me cahndē rē tujún jan. Hane na cahan jan ne, cafehya na cjuandaja cojo Eliseo xi cuisecoo me na. Na vēhē ne, tsajin mé xi tjin rē na ndava na xi machji rēhē ta tu ngu ni nisa xi hinchá aceite, vēhē ni xi tjin ran. Hya xi camá ne, cachja Eliseo cojo na xi cjue scuxetaha na yējē nisa xi cuma sacu rē na. Sehe hya xi cjuehecojo xu na ndava na ne, sehe catsinguitsē na nisa jan cojo aceite xi hinchá nisa lihndi rē na. Hya xi camá ne, casahmi na sacuaha cachja Eliseo. Caseyahñu na cahntsua ndava na cojo



quihndi rē na sehe catsinguitsē na yējē nisa jan cojo aceite xi hinchā nisa lihndi jan. Hane cavuya na cachja na cojo Eliseo mé camá. Sehe cachja me xi cjue cuiteña na aceite jan. Hane tujún xi sacu rē na ne, titjun catechji na tsēhē xuta xi quitjen nima xihin rē na, hane sehe cuma tsicojo na tujún xi cuangui tsēhē gastu rē na.

Hacuaha nixtin hya ne, tjin nixtin xi cafe Eliseo ngu nandya xi hmi rē Sune. Hane ngajan tacun ngu chjuun xi camachaya rē na xi Eliseo ne, sahmi me xa rē Nina. Hane ngatsē rē vēhē ne, hatuxa

casua na me xi sinë me hya xi cafehe me taha vëhë. Hisca cavechu ngu nixtin xi cachja na cojo xihin rë na, hane casahmi me ngu cuarto lihndi rcu ndava me hiscan cuma tsëhë Eliseo. Jemu ndaja xuta vëhë, hane Eliseo ne, meje sahmi me ngu cjuandaja rë me. Sacuaha na vëhë, camajin casacu rë na quihndi. Vëhë xi cafehya me Nina xi sacu rë na quihndi xi meje rë na. Hane cuatjin camá. Catsin quihndi hacuaha cama jyë. Peru ngu nixtin hya xi camajyë quihndi jan ne, hñu cajnë rcu, hane ngu ñahñu ni cahme cha. Hane naa rë cha ne, cavejña na nima xcun nachan rë Eliseo, sehe quiji tjengui na Eliseo xi sua na cumachaya rë me cjuachoho jan. Hya xi camá ne, cafe Eliseo cojo na ndava na. Sehe cavisehen me cuarto rë me hiscan jiña nima, hane cavejña me suva me cojo nima. Sehe cafehya me Nina xi tsingascaya me nima. Cafañasun me nima xi tsihasu me yojo rë. Cavetahacoo me hntsua me cojo hntsua nima sehe cachimatjo me. Sehe cavuya cjuahñu rë cha, cavuxaha cha tuxcun cha. Hane Eliseo ne, cajindaya me naa rë cha xi cjuahatsja na quihndi rë na.

Ngu ndiya nga ne, ngu chíhin cjan rë casatë rë yojo rë ngu capitán rë sindadu rë nangui Siria. Capitán jan ne, Naamán hmi rë



me. Hane chjuun rē me ne, tjin rē na ngu na mosu hndixahan xi cafaha me tsēhē nangui Israel. Hane na mosu jan ne, cachja na cojo nai rē na xi ngajan Samaria, nangui rē na ne, tacun ngu profeta xi cuma sahmi me xi cuma ndaja capitán jan. Hya xi camá ne, xuta matitjun rē Siria ne, casua me Naamán cahndē xi cjue me nangui Israel. Hacuaha catsingatju me ngu xujun xi cjuahatsja Joram me xi matitjun rē nangui vē xi tsirqui me me. Hya xi camá ne, cafahatsja Joram xujun vē, peru hviin me mé xi sahmi me, hane jemu choho cama rē me. Xi má rē me ne, tu cjuehya xuta matitjun jan ngu xcusun xi cumajin cojo sá xi sacuse rē me cahndē xi sahmi me si

cojo rē me. Peru Eliseo camachaya rē me tsēhē cjuacjintacun vē, hane catsingatju me cjua cojo Joram xi tsingatju me Naamán xi cjue tjengui rē Eliseo. Cachja Eliseo xi scuēē Naamán xi tjin sa profeta rē Nina cjuaquixi ngajan nangui Israel. Hane xi cafehe Naamán ndava Eliseo ne, tu catsingatju Eliseo cjua cojo mosu rē me xi cjue catisehen quinda Naamán ndajyē Jordán yatu ndiya, hane sehe cuma ndaja me. Cuatjin cachja mosu jan. Hane Naamán ne, jemu cjan rē me cojo cjua vē. Xi ngu cahndē ne, catsingatahacacun me xi Eliseo ne, cuetju suva me cuinduva sahmi me orar xi cuma ndaja me. Hane xi majo ne, xi má rē me ne, tsajin mé tsēhē xi cuinduya me ndajyē Jordán ta ndajyē xi siu ngajan Damasco nangui rē me ne, hitsē sa ndajyih. Hane cojo vēhē ne, meje cuya me ndava me. Peru ngu mosu rē me, cuitjin cachja cha cojo me:

—Tai. Sá xi cachja Eliseo xi meje rē xi nihñu tu mé ni xcusun xi jemu chja, nihñu cojo cjuasua. Cjua xi cachja me ne, ndastu mé chja cumá, hacuaha tsajin mé nichujun. ¿Mé tsēhē xi miji nihñu?

Hane cojo cjua vēhē ne, cajnecacun Naamán sehe quiji me casahmi me sacuaha cachja Eliseo. Hane xi tu cavetju me tsēhē

ndajyë Jordán xi camá yatu ndiya ne, ha camandaja me. Sehe cavuya quiji me ndava Eliseo ta meje sua me cjuatjo xi jemu venguichji rë. Peru Eliseo ne, miji cjuaha me hisca xi ngu xcusun jan. Hane Naamán ne, cavetju me quiji me xi cuya me nangui rë me.

Hane xi tu sehe cavatju quiji me ne, Giezi, me xi sahmi me xa rë Eliseo ne, quiji tjengui me me xi cjuehya rë me cjuatjo jan. Hane xi cavechutaha me me ne, cachja me cjuandesu cojo me. Cachja me xi cafehe jo cha nixti xi profeta má cha, hane cuma meje rë tujún cojo tsjian rë cha chja xu Eliseo. Hane Naamán ne, casua me mé xi cafehya rë me. Sehe Giezi ne, cavinchahma me xcusun xi cafahtsja me, hane cavuya me ndava Eliseo. Xi cafehe me ngajan ne, Eliseo ne, cavinenguise me me: ¿Jani quiji me? Hane cachja me xi tsajin.

Sehe cuitjin cachja Eliseo cojo me:

—Ndaja hvë jani cahmi. ¿Há ndaja tsejen xi ngu xuta xi sahmi xa rë Nina ne, cjuehya me tujún hora hya? Hacuiin ndaja tsejen. Vëhë xi sua Nina ngaye cjuañihi xcun yëjë nixtin riji ta, cuatji cjuañihi cojo chíhin rë Naamán.

Hane cuatjin jain casatë rë me chihin.



**Nina ne, vaxëtje me xuta nangui Israel hya xi sindadu
rë nangui Siria ne, caxinchandee cha nandya**

(2 Reyes 6:8-8:15)

Nixtin nguyëjë rë xi Joram má me xuta matitjun tsëhë Israel ne, cafehe Ben-adad, xuta matitjun tsëhë nangui Siria cojo sindadu cjin rë me xi sahmi me si cojo me. Peru tu jani xi cafehe me cojo sindadu rë me ne, casacutsja me sindadu cjin rë nangui Israel xi ha siuya rë me xi nduva me. Hane ngatsë rë xi tsejen xi hatuxa vëë condra rë me cjuatacun rë me ne, Ben-adad ne, cavinenguise me xuta rë me jarë me xi vutsejensun tsëhë Israel. Hane cachja xuta rë me xi hisca ngu cha tsajin cha xi cuatjin sahmi cha. Cachja me xi profeta Eliseo ne, vëë me yëjë cjuatacun rë me, hisca cojo cjua xi chja me xi matitjun jan taha hma cahntsua cuarto rë me vëë me. Hane me vëhë ne, sua cumachaya rë Joram yëjë cjua jan. Ngajan xi jemu camacjan rë Ben-adad. Hane catsingatju me xuta rë me xi cjue scutsejensun cha jani tacun Eliseo, cojo sa xi cuma tsingatju me sindadu cjin rë me xi cjuaha rë me. Hya xi camá ne, casacu rë me cjua xi tacun Eliseo ngu nandya xi hmi Dotán. Hane catsingatju me sindadu cjin rë me xi xinchandee cha nandya. Hane hya xi

casahasen ne, cha mosu rē Eliseo cavēē cha sindadu cjin jan. Sehe cachja cha cojo Eliseo cuitjin:

—Chutsujun, Eliseo. Quihndē ne, ¿mé cumá naja?

Hane cuitjin cachja Eliseo:

—Xicarcuiin. Tsajin mé cumá ta hitsē sa cjin má sindadu ladu naja xi cumá rē sindadu ladu rē me xi cuacun vē.

Sehe cafehya Eliseo Nina xi sua Nina cahndē xi cumatsejen rē mosu rē me xcusun xi matsejen rē suva me. Hane Nina ne, casua me cahndē. Hane cavutsejen mosu xi naxi xi tacun tiña Dotán ne, hinchā cjin carreta tsēhē si cojo naxin rē. Hane carreta cojo naxin jan ne, ndihi camá ta ángel ne, tisahmi cuidadu rē Eliseo. Hya xi camá ne, Eliseo cafehya me Nina xi sahmi rca me condra rē me ngu hora lihndi. Hane cuatjin camá rca yējē cha vē. Sehe Eliseo ne, quijitjengui me sindadu rca jan cojo sindadu rē me. Hane cachja me cojo rē cha xi cachaja cha ndiya peru sahmi me cjuandaja xi tsingacun me hacutjin meje rē xi cjue cha. Sehe quijicojo me cha nandya Samaria, o sá nandya xi matitjun me xi tacun sacuahā jyan



hora tsëhë ndiya. Hane xi cafehe me ngajan ne, sehe cafehya me Nina xi sua me cahndë xi cumatsejen nga rë cha. Hane camatsejen rë cha xi hacuiin ndaya tjin cha. Hya ne, meje tsiquehen Joram cha condra rë me, peru casuaain Eliseo cahndë. Cachja me xi sua me xi sinë cha sehe catisua me cahndë catje cha. Hane cuatjin casahmi me. Hya xi camá ne, hacuiin ngutjen cavuya casahmi cha si cojo me.

Peru xi cavatju sa nu ne, catsingatju nga Ben-adad cha sindadu cjín rē me, hane quihndē ne, caxinchandee cha nandya Samaria cojo sa xi camajin quiiji xuta nguijña. Hane ngatsē rē xi cjín nixtin caviyujutaha cha ngajan ne, xuta nandya Samaria ne, hisca meje cueya me xi vojo rē me. Jemu camiji chji rē xichine. Ngu chjuun jan ne, catsiquehen na quihndi rē na xi sinē na cha tsēhē xi vojo rē na. Hane Joram, me xi matitjun ngajan ne, cavetahachaha me Eliseo tsēhē yējē cjuañihi vē. Sehe cavejñacacun me xi tsiquehen me Eliseo, cuatēsun me rcu me. Sehe catsingatju me ngu sindadu ndava Eliseo. Peru cavacun rē Eliseo xi cuatjin cumá, hane cavuxaain me tingotjo ndava me. Sehe ngu hora vēhē ni ne, cafehe suva xuta matitjun jan xi cuisiajmi me cojo Eliseo. Sehe cachja me cuitjin:

—Mé chuva tjin rē xi chjahyan Nina xi cuisecoo me yaan ta cjuañihi vihi ne, Nina catsingatju suva me.

Sehe cachja Eliseo cuitjin:

—Chja Nina xi nchujun ni hora vihi ne, siu xuta xi viteña ndetsin hiscan tu viseen ni nandya. Hane jemu xtengui camahani cuiteña me scuan rē trigu cojo cebada.

Peru ngu xuta xa rě xi cafehe me cojo xuta matitjun jan ne, cachja me cuitjin:

—Quixiin xi nújun. Cjua vėhě ne, jemu chja camaha ni. Sá xi tsingatju Nina yějě comida xi cumá tsingatju me ne, ¿há cuechutaha?

Sehe cachja Eliseo cuitjin:

—Cumá. Hane sacuaaha ngaye ne, sove che peru sacuiin ri xi xini tsěhě.

Hya xi camá ne, űuju xihin xi má rě me ngu chíhin vitaha chuxin rě me ne, siu me taha ndatsen rě nandya, tiña tingotjo ta tsajin cahndě xi cuiyuju me cojo yahnga xuta. Hacuaha tjihme me xi jemu vojo rě me. Ngajan xi catsingatahacacun me xi cjue me ngajan hisca siu sindadu condra rě me. Catsingatahacacun me xi hitsě sa ndaja sá xi ngajan cjue me, ta tsajin comida hane hatuxa cueya me sá xi cuiyuju ni me. Sá xi cjue me ne, cumá xi sacu rě me cjuayumatacun rě sindadu rě nangui Siria. Peru sá xi sacuiin rě me cjuayumatacun ne, sindadu jan ne, tsiquehen cha me, hane tangun ni



cuetju. Hya xi quiji hora ne, quiji me cafehe me ngajan. Peru xi cavechu me hiscan caviyuju sindadu jan ne, hisca ngu sindadu tsajin cha. Ha cavanga cha ta Nina ne, casahmi me xi cahndē cha xi jemu hñu fane carreta xi má cojo si hacuaha cojo naxin vē nduva chu. Hane catsacjun cha camá ta catsingatahacacun cha xi jemu cjín

camaha ni sindadu cjuaha xicjin me cojo rē cha. Hane hora xi cavanga cha ne, caviyuju cha yējē ni xi tsēhē cha, hane tujyē ni siu. Hane sehe ngu hora cavanga cha xi cafehe ñuju me xi cuacun jan. Hane xihin xi hmu rē jan ne, cajinē cahvi me, hacuaha cafaha me tujún cojo tsjian. Sehe cama sava rē me ta choho tjin xi tsingatjiin me cjua cojo yahnga xuta rē me. Sehe quiji me hiscan xi tu viseen tsēhē nandya ne, hane casua me cjua cha sindadu xi sahmi rē cuidadu ngajan. Hane sindadu jan ne, catsingatju cha cjua rē me xi matitjun. Hane me vēhē catsingatju me jo xuta rē me xi cjue scutsejen me sá xi quixi cjua vē. Sehe cavuya me cachja me xi quixi jain. Sehe quiji yējē sa xuta cafaya me xcusun xi siu hisca xi caviyujutaha sindadu rē nangui Siria. Hane camá sacuatjin cachja Eliseo, ta jemu xtengui caxteña scuan rē trigu cojo cebada hiscan xi tu viseen ni tsēhē nandya Samaria. Hacuaha cha xi camacjaain rē jan ne, siu xa rē cha ngajan hisca xi tu viseen ni tsēhē nandya, peru casune xuta cjín cha ngajan, hane cahme cha. Cuatjin camá xi catjucaa quixi cjua xi cachja Eliseo: cha xi cuajyihi ne, cavēē cha mé xi cavatju peru camajin cajinē cha hisca hitsē tsēhē jan.

Hya xi camá ne, quiji Eliseo Damasco, hiscan xi vitexa nangui Siria. Hane hya ne, xuta matitjun rē ne, o sá Ben-adad ne, jiña hmu me. Hane xi camachaya rē Ben-adad xi cafehe profeta jan ne, catsingatju me ngu xuta rē me xi hmi rē Hazael xi cuinenguise Hazael sá xi cumandaja o sá xi cumandajin Ben-adad. Hane Eliseo ne, cachja me xi cumandaja me tsēhē chíhin jan peru hacuaha cachja Nina xi cueya me. Hacuaha cachja Nina xi hya xi cueya me ne, Hazael vē ne, cumá me ngu xatsē xuta matitjun tsēhē nangui Siria. Hya xi camá ne, cavuya Hazael, hane cachja me xi cumandaja me. Sehe hya xi camá nchujun ni ne, quiji Hazael, catsiquehen me me ta cavesun cha ngu tsjanga hnchi xcun me cojo sa xi camajin cajuvē me xta rē me. Hane cahme me. Hane Hazael ne, cavisehen me xa rē nima jan.

**Ngu me xi hacuaha Joram hmi rē me ne, camá me xuta
matitjun rē Judá**

(2 Reyes 8:16-24; 2 Crónicas 21:1-22:1)

Hya xi tjin rē cantyjuhun nu xi tivitexa Joram quihndi rē nima Acab nangui Israel ne, cahme Josafat, me xi matitjun tsēhē nangui

Judá. Hane quihndi tjun rë me xi hacuaha Joram hmi rë me ne, camá me xuta matitjun rë Judá. Hya ne, cavatju can tyjuhun nu xi cavitexa nima nahmi rë me. Hacuaha hya ne, Elías ne, má me profeta ngajan nangui Israel. Hane hya xi cafaha Joram xa rë me ne, sehe catsiquehen me yějë cha hntsë me cojo tu yo sa me xi tjin rë me derechu xi cuisehen me cahndë rë me sá xi cueya me. Chjuun rë me ne, hacui na Atalía, na quihndi rë nima Acab, me xi camá xuta matitjun rë Israel. Hane ngatsë rë na chjuun jan ne, cafaha me xcusun rë xuta matitjun rë nangui Israel ta cafayangui me cjuatsehen xi sahmi me vë. Ngu xcusun jan ne, ngahma rë gobiernu rë me ne, xuta nangui Judá ne, cavuya cafaharcun me nina ndacha. Nina ne, chohovëë me xcusun rë Joram, peru cavejña me xi vitexa me ngatsë rë cjua rë me xi casua me cojo David. Vëhë xi hacuiin tangun camá casahmi Nina cojo xuta matitjun rë Judá sacuaha casahmi me cojo xuta matitjun rë Israel ta ngajan ne, jiya hora ne, catsingatju Nina xuta xi catsiquehen me ngu xuta matitjun tsehen, hane cuisehen me cahndë rë me.

Nixtin xi cavitexa Joram nangui Judá ne, xuta nangui Edom ne, tivechjitje rë gobiernu rë Judá. Peru cafehe nixtin xi quihndë miji

cuechji me hane quiji casahmi me si cojo Judá, hacuaha cacaá rē me xcun si jan. Nina casua me cahndē condra rē Joram xi cacaá me cojo sa xi cumá castigu Joram ta hndiin me. Hane Joram ne, cafahtsja me ngu carta xi catsihindu profeta Elías ta hya ne, chaja sa cjue Elías ngahnga. Cuitjin cachja xujun jan: “Cuitjin chja Nina: Nima Josefát nahmi riji cojo nima Asa nchava riji ne, cahndē me cjua naha. Peru hacjahi xcusun riji ta canihñi yējē xcusun chohocun xi sahmi xuta matitjun tsēhē nangui Israel. Caniquihin yējē tsēhē, peru cha vēhē ne, hitsē sa ndaja cha xi cumá ri. Vēhē xi Nina ne, sua me cahndē xi choho cuatju xuta riji cojo xuta xi vitexe. Hane ngaye ne, cumá hmu ri, sehe cueye.” Cuatjin cachja xujun xi cafahtsja Joram. Hya xi cavatju hitsē nixtin ne, Nina ne, casua me cahndē xi xuta filisteo cojo xuta arabe ne, quiji casahmi me si cojo xuta nangui Judá. Hane cama cafaha xutaxin jan yējē cjuanchina rē Joram. Hacuaha quijicojo me chjuun rē me cojo yējē quihndi rē me. Ngu tu tu ni quihndi ngascan rē me ne, cavejña sa cha vē nangui Judá. Hacuaha casua Nina cahndē xi casatē rē Joram ngu chíhin xi tsēhē ntsehen. Hane chíhin vēhē ne, quijicani rē jo nu, sehe cahme me. Hya ne, cavitexa me xcun jyin nu. Hane hya xi caseyaniji nima

Joram ne, tsajin mé cjuandya camá tsëhë nima. Hane Ocozías, quihndi ngascan jan, cavisehen cha xa rë nima nahmi rë cha.

Jehú ne, catsicjě me yějě xuta tjě rë nima Acab

(2 Reyes 8:25-10:36; 2 Crónicas 22:2-9)

Xuta matitjun xi hmi rë Ocozías ne, cavitexa me xcun ngu nu nangui Judá. Hacuiin ndaja casahmi me xa rë me ta naa rë me ne, na Atalía ne, quihndi rë nima Acab má na, hane na vëhë ne, catsitsehen na me. Hya xi camá ne, ngu nixtin ne, quiji me nandya Jezreel, ngajan nangui Israel ta quiji tjengui me Joram ta tjin rë me cjua cojo Joram xi cuisecoo xicjin me. Hane hora hya ne, jiña hmu Joram ta casacuhmu rë me xcun si xi camá cojo sindadu rë nangui siria.

Hane hya xi tacun cuaha Ocozías nangui Israel ne, profeta Eliseo ne, catsingatju me ngu profeta xicjin me xi cjue tjengui rë me ngu me xi hmi rë Jehú. Jehú jan ne, ngu capitán má me tsëhë sindadu rë nangui Israel. Hane xi cuechutaha me Jehú ne, cjuehma me cojo me, sehe cuitejnu me aceite rcu Jehú sehe cuichja me cojo

me xi cumá me ngu xatsë xuta matitjun rë nangui Israel. Hacuaha tjin rë me xi tsiquehen xu me yějë cha xihin xi tjë rë nima Acab má cha. Hacuaha tsiquehen xu me na Jezabel, na chjuun rë nima ta jemu catsiquehen na xuta xi faharcun rë Nina. Hane profeta jan ne, casahmi me sacuaha cachja Eliseo cojo me, sehe cavanga me cavuya me. Hya xi camá ne, cavuya Jehú hiscan siu capitán xicjin me. Hane me vëhë ne, cavinenguisse me mé cachja profeta. Hane hya xi cachja Jehú xi satë rë me xi cumá me xuta matitjun ne, xuta xicjin me jan ne, casua rë me ngahñu rë cjua.

Hya xi camá ne, ngajñi rë yějë me vëhë ne, cavetsihin catsingatahacacun me hacutjin ndatjin xi tsiquehen me Joram ta Joram ne, tacun me ndihyavasen tsëhë nandya Jezreel hane tijima ndaja me hiscan casacu hmu rë me. Sehe camiji Jehú carreta rë si hane caseya ndiya cha nandya Jezreel. Hane xi canduva tiña me Jezreel ne, cavëë Joram cojo Ocozías xi nduva tiña me. Sehe catsijo ni me vëhë ne, camiji me carreta rë me, hane quiiji casacu xicjin me cojo Jehú. Hane hora xi casacu xicjin ne ne, Joram ne, cavinenguisse me Jehú sá nduva me cojo cjuandaja. Hane Joram ne, cachja cha xi majin cuisehen cjuandaja nangui Israel hya xi cjuinduju chjaharcun

rë na Jezabel, naa rè Joram, nina ndacha hane hacuaha cjuinduju sahmi na surqui.

Ngajan xi cavacun rè Joram xi jemu tsavi tjin ta Jehú ne, canduva me xi cjuahatahá me xa rè me, hane cajindaya me tsëhë Ocozías xi cuanga me. Hacuaha cavanga suva me. Peru Jehú ne, cavetaha me ngu flecha Joram, hane catsiquehen me me. Hane hitsë hora ngascan ne, hacuaha catsiquehen me Ocozías. Catsijo nima ne, tjë rè Acab má me. Sehe tu catsingatjen me yojo rè Joram xcun nangui xi camá tsëhë Nabot, hane jni rè nima ne, ngajan cavixu. Sehe cavisehen Jehú nandya Jezreel. Hora hya ne, na Jezabel ne, tivutsejenhma na taha ventana rè ndihyavasen. Sehe cachja Jehú cojo jo cha mosu rè ndihyavasen xi tsingatjen cha na taha ventana. Cuatjin casahmi cha mosu jan, hane cahme na hya xi cjanengui na. Hya xi camá ne, catsingatju Jehú ngu xujun tsëhë xuta xi sahmi me cuidadu rè cha nixtin xi tjë rè nima Acab cha. Chja xujun xi meje rè xi cuaxijin me jarë cha vë xi cuma cha xuta matitjun. Sehe cuaja xicjin me cojo Jehú ngatsë rè xuta rè Acab. Peru me xi cafhatsja me xujun jan ne, tsacjun me ngahñu cjua rè Jehú. Hane catsicuya me cjua xi tsajin yo sahmi me xuta matitjun. Sehe cavitexa Jehú me

xi sá xi cuatjin ne, tsiquehen me yějě cha nixti jan. Jyanchan tē má cha nixti jan, peru catsiquehen me yějě ni cha sehe catsingatju me rcu cha xcun Jehú. Ngajan camá xi catsiquehen Jehú ngayějě ni xuta tjě rě Acab cojo yějě xuta xi casua rě me ngahñu. Cuatjin camá xi camá chihin cjua rě Nina xi cachja profeta Elías cojo nima Acab.

Jehú, sacuaaha xuta matitjun rě xuta nangui Israel ne, miji rě me xi cjue nduju cjuaharcun xuta vė nina ndacha xi hmi rě Baal. Hya xi camá ne, casahmi cha sacuaaha xi cuma ngu suhi jyě rě nina ndacha jan. Cachjindaya rě yějě me xi sahmi me xa sacuaaha nahmi rě nina ndacha o sá profeta rě. Hane hya xi camatangun yějě me cahntsua yungun rě me ne, cavitsejen ndaja me xi tsajin hiscan ngu xuta xi faharcun me Nina cjuaquixi ngajñi rě me vėhė. Sehe catsiquehen me chu xi casua me sacuaaha ngu cjuatjo xi tjin chihin. Sehe cavitexa me sindadu rě me xi cuisehen me yungun jan hane tsiquehen me yějě xuta ndacha jan. Hacuaha catsinguetsun me yungun jan. Hya xi camá ne, cojo vėhė ne, camajin cafaharcun xuta Baal.

Nina ne, cachuya rē me xi catsinguetsun Jehú cjuatacun vë. Casua me cjua rē me xi xuta tjë rē Jehú cuisehen me xa xi cuitexa me Israel. Quihndi rē me hisca quihndi rē quihndindai cjin rē me ne, cuma me xuta matitjun. Jehú ne, casahmi me xi ndaja peru hacuaha casahmi me xindajin ta cafaharcun me hndindyaja tsëhë oro xi casahmi Jeroboam. Ngu nixtin hya ne, casua Nina cahndë xi sindadu cjin rē Siria ne, cafahataha cha nangui tsëhë xuta tjë rē Israel xi tacun taha ladu vetjucaa tsuhi tsëhë ndajyë Jordán. Can jyin nu cavitexa Jehú nangui Israel, sehe cahme me. Hane quihndi rē me xi hmi rē Joacaz ne, camá me xuta matitjun.

Atalía hane sehe Joás cavitexa me nangui Judá

(2 Reyes 11-12; 2 Crónicas 22:10-24:27)

Hya xi camá ne, camachaya rē na Atalía, na cahan rē Joram xi Jehú catsiquehen me Ocozías, quihndi rē na xi má me xuta matitjun. Hacuaha quihndë tsajin sa cha quihndi rē na. Vëhë xi cavejñacacun na xi tsiquehen na yëjë xihin tjë rē nima David sehe, chuva vëhë ne, na vëhë cumá na xuta matitjun ta ha quihndë tsajin ngu cha xi satë rë cha xi cumá cha xuta matitjun. Hane cavetsihin catsiquehen na cha

tjê rê nima David. Peru Josaba, na quihndi rê nima xuta matitjun Joram jan ne, caveyahma na quihndinda rê hntsê na Ocozías. Quihndi vêhê ne, Joás hmi rê cha. Hane nixtin hya ne, jemu lihndi sa cha. Vêhê xi na Josaba cojo Joiada, xihin rê na, cavinchahma me cha cojo ngu na chjuun xi cafahacuenda na cha. Joiada ne, nahmi matitjun má me, hane cavinchahma me cha cahntsua ngu cuarto lihndi rê yungun. Cavejña cha ngajan jyun nu. Hane nu jan ne, na Atalía, chicuhun rê cha ne, cavitexa na nangui Judá.



Hya xi cafë Joás yatu nu ne, xi má rë Joiada ne, ha casacu ndaja rë me ngahñu rë cjua xi cumameje rë me, hane cuma cjuenduju me cojo cjuatacun rë me xi sahmi me xi cumá Joás xuta matitjun. Ngajan xi cajindaya me me xi vitexa sindadu xi cjue me cumatangun me ngajan yungun. Sehe catsingacun me cha Joás, quihndi rë nima xuta matitjun, ta quicun cha. Sehe camatangun cjua rë me xi cha Joás ne, cuma cha ngu xatsë xuta matitjun. Sehe casahmitangun me xuta levita cachja cojo me xi sahmi me cuidadu cha hora xi cuincha me aceite rcu cha cojo sa xi tsajin mé cuma sahmi chicuhun rë cha cojo cha. Hane cuatjin casahmi me. Sehe cavaxë me Joás tsëhë yungun hiscan jiyahma cha hane cavesun me cha xcun ngu cahndë hnga hitsë xi camá cojo yatë. Sehe cavesun me ngu corona rcu cha hane cavincha me cha aceite. Hane xuta ne, casua me ngahñu rë cjua xi Joás ne, xuta matitjun má cha. Hacuaha jemu tjin rë me cjuasua ta casë me hacuaha catsijane me.

Hya xi camá ne, chicuhun rë cha, na xi cafaha xa xi cumá na xuta matitjun jan ne, cahndë na cjuandya xi tijima. Hane cafehe na ndatsen yungun xi meje scutsejen na mé tijima. Hane hya xi cavutsejen na cha Joás xcun yatë jan ne, cavetsihin cajindaya na ta

xcusun xi tijima ne, condra rē gobiernu cjuaquixi xi jimá. Hane nahmi Joiada ne, cavitexa me nisē yungun jan xi cjuejaha me na, cuaxē me na tsēhē yungun hane sehe tsiquehen me na. Hane cuatjin casahmi me.

Sehe Joiada, sacuaha nahmi xi matitjun jan, casahmi me xi Joás cojo ngayējē ngarca ne, casua me cjua rē me xi cjuaharcun me ngu tu tu ni Yahvé, Nina xi cjuaquixi. Hya xi camá ne, yējē xuta jan ne, caxincha ndiya me hiscan yungun rē Baal ngajan Jerusalén. Hane xi cafehe me ngajan ne, catsinguetsun me yungun vē. Hacuaha catsiquehen me nahmi xi casahmi me xa yungun vē. Sehe cachja Joiada cojo xuta levita hane casua rē jima ngu me xa rē yungun xi casatē rē xutachanga rē me hya xi cachja Nina cojo nima Moisés hacutjin cumá.

Cuatjin camá xi Joás camá nga cha xuta matitjun tsēhē nangui Judá. Jemu cjín nu xi cavitexa rē cha, hane cafaharcun cha Nina. Hya xi camacha cha ne, Joiada cavaxijin me jo na nixtin xi camá na chjuun rē cha, hane casacu rē cha quihndi. Hya xi cavatju sa nu ne, Joás ne, cachja cha xi fehya me tujunsa xi satē rē yungun rē Nina.

Sehe casahmi rē cha xi camá ndajyihi yungun cojo tujún vë.
 Hacuaha cojo vëhë ne, ndaja cavejña hñu. Hya ne, ndaja casahmi
 Joás.

Peru hya xi cahme Joiada ne, ngujo cha xa rē Judá ne, cavincha
 haxi cha Joás xi cjuaharcun rē nina ndacha. Hane Nina ne,
 catsingatju me cjua cojo profeta xi quihndë cjuaharcuaain xuta nina
 ndacha, ta suva Nina cjuaquixi catjaharcun me. Peru
 cafahacuendaain xuta profeta jan. Ngu cha profeta jan ne, hacui
 Zacarías, quihndi rē Joiada, tsini rē cha. Cuitjin cachja Zacarias
 cojo xuta.

—Hya xi cuatjin chjuuncuendun cjua rē Nina ne, tivinchun
 suvun cjuacjintacun yojo nuju. Canismutacun Nina, hane Nina ne,
 tsismicacun me yun.

Cachuyaaain rē Joás cjua xi cachja Zacarías. Catsingatju me xuta
 rē me xi cuetaha me me ndyojo hisca xi cueya me. Hane camá
 cavetaha rē me ndyojo ngajan ndatsen yungun. Vëhë xi cahndë rē xi
 tsicuya me cjuandaja rē ndava tsini rē me xi cavetjo rē me ne,
 catsiquehen me quihndi rē tsini rē me. Hya xi camá ne, Nina ne,

casua me cahndë xi sindadu cjin rë Siria ne, cavisehen me nangui Judá cojo sá xi satë rë Joás cjuañihi tsëhë xi catsiquehen me Zacarías. Hane hya xi cafaha xicjin me cojo sindadu cjin rë nangui Judá ne, catsiquehen me yëjë cha capitán ladu rë Judá. Hacuaha cavanguihmu me Joás. Ngajan xi ngujo mosu rë Joás xi jiyacacun me xi catsiquehen me Zacarías ne, catsiquehen me Joás xcun nachan rë me. Hya xi cahme me ne, ha tjin rë yachan nu xi cavetsihin cavitexa me nangui Judá. Sehe Amazías, quihndi rë me ne, camá cha xuta matitjun.

Profeta Joel ne, chja me cjua rë Nina cojo xuta tsëhë nangui Judá

(Joel 1-3)

Ngu ndiya hya xi nangui Judá ne, má ngu nación ne, catsingatju Nina ngu cjuacjintacun tsëhë xuta jan. Cjuacjintacun jan ne, cama xi chu nchahva cojo chu xicjin chu xi jinë chu xitjë ne, caffè cajinë chu xitjë rë xuta nangui Judá ne, cjin xuta xi camavojo rë me ta tsajin camahani mé xi sinë me. Hacuaha casahmi Nina xi cavaain tsi. Hane catsingatju me ngu profeta xi hmi rë Joel xi cachja me



cojo xuta jan mé tséhě xi cuatjin tivatju
me cjuachoho vėhě. Joel ne, cuitjin
cachja me:

—Ngayějě ni ngayun xuta changá
cojo ngayějě ngayun xuta ngarca ne,
cumandaja tsujun sá xi cuinuhyun cjua
xi chjá cojo nuju. Quixi jain xi choho

tivatjun. Cafě cavetsun yějě ni xi cavinchan tjě. Nu vihi ne, tsajin
yo xuta naja xi ndaja cumá rě me hya xi chunihngan xitjě naja.
Sahmi ngujoyě xi chjayan cjuandaja rě Nina xi cuisecoo me yaan.
Sacuiin naja hisca hitsě xitjě xi cumameje rě xi sua naja cjuatjo cojo
Nina. Tsejen sacuaha xi Nina ne, meje tsicjě me ngasunhndě.

'Peru sá xi cuyun chjuhunrcun nga Nina hane sá xi ningacun rě
me xi choho ma nuju xi canihñu xcusun chohocun xi canihñu ne,
sehe tsinchataha me yun. Hane sá xi mayuma rě me yaan, cumá xi
sahmi me xi cuya sacu hñu naja. Nina ne, jemu tjin rě me cjuajeya
hacuaha jemu ndaja me. Tsajin rě me cjuasua xi cuatjun cjuañihi.
Vėhě xi meje rě xi nindeyun cjuatacun nuju cojo nguñaja tacun, ta

tsajin mé machjirëhë sá xi cuenda nihñu sacuaaha xi choho má nuju peru hacuiin cojo cjuaquixi. Vëhë xi ngayun, xuta changá, chjindayun rë yëjë xuta xi cuinduva me. Sehe cuinechan xun rë Nina cojo sa xi tsejen xi ninguitsjen yëjë xi choho canihña hane choho má naja. Sehe catisahmi nahmi oración rë me xi cjuehya me Nina xi tsinchataha me yaan.

Hya xi camá ne, casahmi xuta sacuaaha cachja profeta Joel. Sehe cafayangui Nina tsëhë me. Cachja Nina xi tsingasehen me yëjë dañu xi tisahmi chu nchahva. Casua me cjua rë me xi cuya ndaja cuatju nga me. Hacuaha ndaja cumá xitjë rë me, hisca cueyangojo me tsëhë nixtin xi camá jindya ta casacuiin rë me nixtin hya ne, sacu rë me quihndë. Hane sahmi jyë nga me Nina ngatsë rë yëjë cjuandaja xi sahmi me tsëhë xuta.

Hacuaha casua Nina cjua rë me xi cuechun ngu nixtin xi tsingatju me Hasen rë me xi cuisehen rë yëjë xuta, sá chjuun sá xihin me. Hane ngatsë rë Hasen jan ne, tu mé ni xcusun cuarcun cumá. Cumá ngajan ngahnga hacuaaha cumá nguehe nangui. Hane cojo vëhë ne, scuëë xuta xi Nina ne, tacun me. Cuatjin cuatjun hya xi

chaja sa cuechu nixtin xi ha cavaxijin me xi hya ne, tsicjê me ngasunhndê. Hya ne, tu yo ni xi cjuehya rê Nina xi cuisecoo rê me ne, cuaxêxin Nina me tsêhê yêjê ni cjuañihi xi tijima. Hacuaha cachja me xi hya xi ha cavatju nixtin rê cjuañihi jan ne, hacuaha cavatju nixtin xi xutaxin quijicojo me xuta tjê rê Judá nangui cjin ne, sehe tjin cjuaquixi xi cuya ndaja cuatju nga xuta tjê rê Judá. Hane xuta xi quiji tjengui rê xuta tjê rê Judá cojo cjuañihi ne, cuatju me castigu ngatsê rê xcusun chocun xi casahmi me. Hane nandya Jerusalén ne, cuma nandya rcun rê Nina; ngajan cuiyujucahndê me hane sahmi me cuidadu xuta tsêhê Judá. Vêhê cjua xi cachja Nina cojo profeta Joel.

**Joacaz, Joás cojo Jeroboam xi majo ne, cavitexa me
nangui Israel, hane Amazías ne,
cavitexa me nangui Judá
(2 Reyes 13:1-14:24; 2 Crónicas 25)**

Hya xi cahme Jehú ne, quihndi rê me xi hmi rê Joacaz, camá me xuta matitjun. Hane Joacaz ne, cavitexa me nangui Israel xcun

tyjuhun jo nu. Hane sacuaha xcusun rē yahnga nima xuta matitjun rē nangui Israel ne, hacuanitjin xcusun rē me ta cafaharcun me hndindyaja tsēhē oro. Xcun nixtin hya ne, Nina ne, casua me cahndē xi Hazael, xuta matitjun rē Siria caca rē me xcun si xi camá, hane ngatsē rē vēhē ne, titjun cavechjitje Joacaz Hazael, hane sehe cavechjitje me Ben-adad majo, quihndi rē Hazael. Cjin nu cavechjitje me me. Peru hya xi cafehya Joacaz cjuandaja rē Nina ne, Nina ne, casua me ngu me xi cavaxētje me me tsēhē xuta Siria. Sehe cahme Joacaz, hane Joás, quihndi rē me camá me xuta matitjun. Cavitexa me xcun tyjuhun ngu nu. Hane cafaharcun me hndindyaja tsēhē oro sacuaha xcusun rē xutachanga rē me.

Sehe tjin rē ngu nu xi cavisehen me xa rē nangui Israel, hane ngajan nangui Judá ne, Amazías cavisehen me xa rē me sacuaha xuta matitjun ngajan. Amazías ne, quihndi rē Joás má me. Cavitexa me xcun can ñaja nu. Me vēhē ne, xuta ndaja me, hacuaha ndaja cavitexa me ta tyjahi me cojo cjuatacun rē me. Peru hacuaha jiya hora ne, casecjan xi casahmi me. Hya xi cavetsihin cavitexa me ne, cavitexa me xi tsiquehen xuta jo cha tsiquehen xi catsiquehen rē nahmi rē me. Catsiquehen me cha vē peru ndaja casahmi me ta

hacuiin cojo quihndi rē cha catsiquehen me cha. Cahndē me cjua rē ley rē Nina xi chja ta miji rē xi cojo quihndi rē xuta tsehen ne, cueya cha sacuaaha castigu tsēhē xcusun tsehen xi sahmi xutacha ra.

Ngu nixtin ne, casahmitangun me yējē sindadu cjín rē nangui Judá xi cjue cuaja xicjin me cojo sindadu nangui Edom. Hacuaha cavatsē me sindadu tsēhē nangui Israel xi cuisecoo rē me. Peru chaja sa xi cuechu me si jan ne, cafehe ngu profeta xi cachja cojo me xi Nina ne, cuisecuiin rē me sá xi cjuecojo me sindadu tsēhē nangui Israel. Hya xi camá ne, Amazías catsicuya me yējē sindadu jan xi cuya me nangui rē me. Hane sindadu jan ne, cavuya me nangui rē me, peru jemu xti rē me. Hane ndiya cjui me ne, jemu cjín nandya tsēhē Judá cavatju me. Hane catsichējē me yējē xi casacu rē me hya xi caxincha ndiya me xi cafe me. Sacuaha si xi tijima cojo Edom jan ne, Amazías cojo sindadu rē me ne, caca rē me xcun si jan. Peru hya xi camá ne, casahmi me ngu cjuangarca ta cafaha me canduvacojo me Jerusalén nina xi faharcun xuta condra rē me. Hane handasa tsejen xi camachjiriin nina jan xi cuaxētje rē me ne, Amazías, catsiquehen me chu xi casua rē me cjuatjo cojo nina ndacha jan. Hya xi camá ne, Nina ne, catsingatju me ngu profeta xi

cachja cojo Amazías xi Nina ne, cjan rë me ngatsë rë xi cafaharcun me nina ndacha.. Hacuaha cachja profeta jan cojo rë me xi Nina ne, sahmi me xi tsajin nixtin xi ndaja tjin rë me. Sehe cavanga profeta ta tsëhë xi me xi matitjun vë ne, cachja me xi tsiquehen me profeta jan.

Cavatju sa nixtin hane Amazías ne, catsingatju me cjua xi cjuahatsja Joás, me xi matitjun tsëhë nangui Israel. Cachja me xi sahmi me si cojo xicjin me tsëhë xi sindadu tsëhë nangui Israel ne, catsichëjë me tsëhë nandya Judá hya xi cavuya me ndava me. Hya xi camá ne, catsicuya Joás cjua ta ngu cjuangarca má cjua vë. Chja me ta handasa camá caca rë nangui Judá xcun si xi camá cojo nangui Edom ne, hacuiin cuatji cuatju cojo tu mé ni si. Hane sá xi cuaja xicjin me cojo nangui yehe sacuaha Israel ne, scaa rë nangui Israel. Peru Amazías ne, miji cuihndë me cjuajeya. Casahmitangun me sindadu cjín rë me sehe quiiji cavaja xicjin me cojo sindadu nangui Israel. Hane xi caca rë sindadu nangui Israel xcun si jan, catsingatjen me ngu rqui rë hinchua xi casexo rë xi vitijnuya yëjë tahndee rë nandya Jerusalén. Hane xi cavisehen me nandya rcun jan ne, cafaha me yëjë tujún cojo yëjë sa mé xcusun xi hnga chji rë xi

tsëhë yungun rë Nina cojo tsëhë ndihyavasen rë me xi matitjun, sehe quijicojo me ngajan Samaria, nandya rcun rë me. Vëhë castigu xi casahmi Nina xi casatë rë Amazías tsëhë xi cafaharcun me nina ndacha.

Sacuaha nixtin hya ne, profeta Eliseo cama hmu rë me. Hane tsëhë xi cavacun rë me xi ha tacun tiña nixtin xi cueya me ne, cachja me cojo Joás ngu sa cjua. Cachja me xi cuisecoo Nina sindadu rë Israel xi scaa rë me cojo sindadu rë Siria. Hane cuatjin camá ta hya xi cahme Eliseo ne, Joás cojo sindadu rë me ne, caca rë me xcun si cojo sindadu cjin rë Ben-adad xi majo, me xi matitjun tsëhë Siria. Sehe hya xi cahme Joás ne, quihndi rë me xi hmi rë Jeroboam xi majo ne, camá me ngu xatsë xuta matitjun rë nangui Israel. Jeroboam xi majo ne, cavitexa me yachan ngu nu. Quijitjengui me xcusun rë yahnga xuta matitjun jan xi cafaharcun me hndindyaja tsëhë oro. Hacuaha me vëhë ne, ngu xuta hñu camá me.

Cahme Joás xuta matitjun rë nangui Israel, peru sacuaha nangui Judá ne, Amazías me xi matitjun ngajan ne, cavejña sa me cjuahñu tyjuhun nu. Sehe ngu jo xuta nangui Judá xi condra rë me ne,

camatangun cjua rē me xi tsiquehen me me. Hane hya xi catsiquehen me me, quihndi rē me xi hmi rē Uzías camá me xuta matitjun.

Jonás ne, chja me cojo me xi matitjun tsēhē nangui Israel, hacuaha chja me cojo xuta nandya Ninivé xi Nina ne, tsinguetsun me nandya vē

(2 Reyes 14:25; Jonás 1-4)

Nguyējē rē xi vitexa Jeroboam xi majo nangui Israel ne, cavejña ngu profeta xi hmi rē Jonás. Nina ne, catsingatju me Jonás xi cuichja me cojo Jeroboam xi majo xi jercu cjín si scaa rē me xcun hisca cuya sacu nga rē me ngujo nangui xi catsichaja nangui Israel xcun si xi camá nixtin xi cavatju. Hane camá chihin cjua vē. Nina ne, cavisecoo me Jeroboam xi majo xi nangui Israel ne, cavuya casacu hñu rē.

Hacuaha profeta Jonás ne, catsingatju Nina me nandya Ninivé, nandya rcun rē nangui Asiria. Hane xi cjuehe me ngajan ne, cuichja me cojo xuta nandya jan xi camá tiña nixtin xi Nina ne, tsinguetsun



me nandya jan cojo yějē xuta xi siu ta jemu
 cjín xcusun cjuatsehen tisahmi me. Peru Jonás
 ne, miji cjue me ngajan, hane cahndē rē vėhē
 ne, cavisehen me ngu barcu xi cjuexin
 camahani tsėhē Ninivé. Xi má rē me ne, cuma
 cumá cjin me tsėhē Nina. Peru Nina ne,
 catsingatju me ngu tjo jne. Hane tsejen
 sacuahā xi cuetsun barcu jan. Hya xi camá ne, jemu catsacjun
 camaha ni xuta xi hinchā me cahntsua barcu. Hane cavetsihin
 casahmi me suerte cojo sa xi sacū rē me yo xi cun rē tsėhē tjo jne
 jan. Hane casatē rē Jonás suerte jan. Hya xi camá ne, cha xi yahnga
 jan ne, cavinenguise cha Jonás mé xi casahmi me. Hane sehe cachja
 Jonás ta tivanga me tsėhē Nina. Hacuaha cachja me xi sejyu tjo jne
 vē sá xi tsingatjeya cha me ngajñi ndachacun. Miji sahmi rē cha
 sacuahā cachja Jonás peru casacuiinyiin rē cha mé sa xi sahmi rē cha
 ta tjo jne jan ne, hitsē sa hñu cavanga. Sehe cavacun rē cha xi ha
 quihndē tsajin sa cjuetacun xi cuetjutje cha. Sehe caviyujucacun cha
 hane catsingatjeya cha Jonás xcun ndachacun. Hane hora vėhē ni
 ne, cavašen tjo jne. Ngajan xi cavacun rē cha xi Nina rē Jonás ne,
 jemu tjin jain rē me ngahñu.

Xi cavisehen Jonás ngahma nanda jan ne, caféhe ngu chu ti xi catsingatju Nina hane catsinguijne chu me. Jonás ne, caseya me cahntsua ti jan xcun jyan nixtin cojo jyan nixten. Hane nguyëjë rë xi jiya me ngajan ne, casahmi Jonás oración rë me hane casua me nacuechji rë Nina tsëhë xi catsingatju Nina ti ta ti jan ne, cavaxëtje rë me tsëhë xi camiji rë me cojo nanda. Hane xi cafë jyan nixtin xi jiya Jonás cahntsua chu jan ne, Nina cavitexa me chu xi cuesu rë chu Jonás xcun tsumi tjehe ndachacun. Hane cuatjin casahmi chu. Sehe cachja nga Nina cojo Jonás xi cjue me Ninivé. Hane hya ne, cahndë me cjua vë. Quiji me Ninivé, sehe cachja me cojo xuta nandya vë cuitjin:

—Hya xi cuechu yachan nixtin ne, Ninivé ne, cuetsun.

Hane xi cahndë xuta Ninivé cjua vëhë ne, jemu choho camá rë me. Hane me xi matitjun rë nandya jan ne, catsingatju me cha nisë xi cuichja cha cojo xuta xi cuiyujuxin me yëjë xcusun cjuatsehen xi sahmi me, hane cuiyuju xun me hacuaha sahmi me oración. Chja me ta xi cuatjin ne, cumá xi Nina ne, yuma cuma rë me xuta nandya jan. Hya xi cavëë Nina xi xuta jan ne, jemu choho camá rë me tsëhë

xi choho jain casahmi me ne, cavejñacacun me xi cjuayangui me oración rē xuta hane tsinguetsiin me ciudad.

Peru Jonás ne, camaxti rē me xi yuma camá rē Nina cojo xuta nandya jan. Sacuaha xi vengui sa chji rē xi caveni quiiji cachja me cojo xuta jan. Cuitjin cachja me cojo Nina:

—Ngahan ne, ha hvē xi cuitjin cuma. Hisca ngatsē rē vēhē xi cavánga cējē cahntsua barcu. Hvē xi jemu xuta ndaja yun, hane tjin nuju cjuasua hya xi cuma ninchatuhun xuta. Xi má ná ne, ndatjin xi ningquetsun xuta nangui vi cojo cjuatsehen rē me, hane vēhē sa xi tejñaya quihndē. Quihndē ne, jercu maxti ná hisca meje ná xi cueya. Hitsē sa ndaja ne, nicuhun ná ngahan.

Sehe cafayangui Nina cuitjin:

—Tsēhē xi jercu venguichji rē xuta, vēhē xi ndaja casahme hya xi camá yuma ná xuta tsēhē ciudad vihi hane catsinchátaha me.

Profeta Amós ne, chja me cjua rë Nina cojo xuta nangui Israel

(Amós 1-9)

Xcun nixtin xi Jeroboam xi majo sahmi me gobiernu nangui Israel ne, Nina ne, catsingatju me cjua rë me cojo ngu profeta xi hmi rë Amós. Hane Amós ne, cachja me cojo xuta cuitjin:

—Cuitjin chja Nina: “¡Tinuhyun cjua naha, ngayun xuta nangui Israel! Ngahan xi canduvá cojo xutachanga nuju cahndë vihi hisca tsëhë nangui Egipto. Hane ngahan cavuxejenjñe nuju tsëhë yějë xuta yahnga xi siu me ngasunhndë xi cumá yun xuta naha. Xuta naha má yun, peru cojo sa xi cuya nuhyun cjua naha ne, suá nuju cjuañihi. Vëhë xi cojo tjun sa ne, tisuá jima chaya rë profeta naha mé xi sahme, cojo sá xi hya xi cumá ne, hyun xi ngahan sahme xi cuatjin cumá. Cuinduva ngu condra nuju xi tsinguetsunya me yějë xi canihñu hane cjue cojo me yějë xi machjirëhë tsujun. Cumá cjuañihi jyë vë ta canihñucuenduun cjuañihi xi ha catsingatju. Ha catsingatju nuju jindya, hacuaha casahme xi cavaain tsi, catsingatju chíhin xi casatë nuju cojo xi casatë rë xitjë nuju. Peru ngajñi rë

cjuañihi vëhë ne, miji cuyun cuinuhyun cjua rë ley naha. Vëhë xi hitsë sa ndaja ne, cumá cjuañihi jyë. Tuhunchjinu yojo nuju ta chutsujun ngahñu naha ngajñi rë cjuañihi. Xuta condra nuju vëhë ne, tsiquehen nuju jemu cjín ngayun. Hane chaja ngahñu cjua rë gobiernu nuju.

'Hacuaha chja Nina cuitjin: "Sá xi meje nuju xi ndaja cuatjun ne, hitsë sa ndaja xi chjuhuncun ná ngahan xi tjin ná ngahñu xi cumá rë xi chjuhuncun nina ndacha xi machjiriin. Quihndë ne, cahndë xi cuisécoo nuju, camá ngahan condra nuju ta tsajin nuju cjuaquixi hya xi nihñucuendun xi cun rë xuta, hacuaha tsajin cjuandaja ngajñi nuju, hacuaha cjuandesu ni nújun. Vëhë xi xuta xi quicun cjuatacun rë me ne, caveni cuinchajyë me xuta xi tjin xi cun rë me. Ngayun tujyë ni vindachun hacuaha choho nihñu cojo xuta yuma xi meje nuju cuma nchina sa ngayun. Peru tifahacuenda rë vëhë, hane satiin nuju xcusun xi cuetjucaa tsëhë cjuanchina jan. Nújun xi meje nuju xi sahme gobiernu. Peru gobiernu naha ne, hacuiin sacuaha xi má nuju. Nihñu cjuasua jyë hacuaha nicuhun chu xi tichjuhuncun ná cojo sa xi ndaja tsejen. Peru chuyiin ná xcusun jan ta tsëhë xi hacuiin cuatjin cjuaquixi. Sá xi cjuaquixi meje

chjuhuncun ná ne, meje rē xi ndaja ngayun cojo jingu sa xuta hane
 tuhun rē yějē ni xuta mé xi satē rē me. Peru ngayun ne,
 cuangunndujun cojo xusun nuju xi chjuhuncun nina ndacha. Hane
 vėhė xi cuaxėxen nuju tsėhė nangui vihi hane cuangun cuinechun
 ngu cahndė cjín xi hacuiin tsujun. Hane ngayun xuta nchina jan xi
 má nuju xi tsajin mé cuatjun, tjun satē nuju cuangun. Chohovėė
 nuju ta nihñu jyė nihñu hnga yojo nuju, vėhė xi satē nuju castigu.
 Hane tsicjė xuta ndava Jeroboam xi majo ta, cueya yějē me. Hane
 sacuaha ngasuncun hiscan xi nicuhun chu xi tuhun rē nina ndacha
 ne, cuetsun hane tsajin nixtin xi cuya cumachjirėhė.



Hane nahmi tsëhë hndindyaja tsëhë oro xi tacun ngajan nandya Betel ne, cahndë me cjua xi cachja Amós. Titjun quiiji cachja me cojo me xi matitjun hane sehe quiiji cachja me cojo Amós. Cachja me cojo Amós xi hitsë sa ndaja xi cuetju Amós nangui Israel hane cjue me nangui Judá sehe ngajan cuma me profeta. Peru Amós ne, cafayangui me cuitjin:

—Ngahan ne, paxtu rë chu tsánga ngahan. Peru Nina ne, cavitexa me ngahan xi cuichjá cjua rë me cojo xuta tsëhë nangui Israel. Ngaye ne, tichjahye ná xi quihndë cuichjaan cjua vihi. Hane Nina ne, cuitjin tifayangui me tsijin: “Quihndi riji ne, tsiquehen xuta. Sacuaha chjuun riji ne, cuma rë na ngu jyë xi cuiteña na yojo rë na. Nangui riji ne, xticja rë ngajñi rë ngu xuta, hane ngaye sove ne, cueye ngu nangui cjin. Ngayëjë xuta nangui vihi ne, cuaxëxin Nina me tsëhë nangui vihi hane cjue cuiyujucahndë me ngu nangui cjin xi cuma me castigu.

Sehe cachja nga Nina cojo Amós cuitjin:

—Cuma castigu xuta xi viteña tutjë ta maxti rë me ta hya xi nixtin jyë cumajin cuiteña me. Hane nixtin xi cuma cuiteña me ne,

hacuiin chichihin sahmi me ta tsicojoxa me ngu nisu chuva hya xi tsichuva me tutjê xi cuitëña me, peru hacjahi nga nisu cjuaha me hya xi tsichuva me quicha tyava xi cuechji xuta tutjê xi cavatsë me.

Sehe cachja nga Nina cuitjin:

—Cuechu nixtin xi xuta tjê rê Israel vi ne, cjuetjengui me cjua naha cojo nguñaja cacun me sacuaaha xi vojo rê me tsëhë. Hya ne, cuanguise me yo xi cuichja cjua naha, peru sacuiin rê me. Castigu vë satë rê me xi cafarharcun me nina ndacha. Hya ne, cumajin cuetjuhnga me tsëhë cjuañihi xi hatuxa tijima. Hya ne, tsicjê gobiernu rê nangui Israel, peru hacuiin cojo yějê xuta rê. Xuta xi tsehen cjuatacun rê me xi chja me xi tsajin mé cuma rê me ne, cueya xuta vë. Peru tjin yahnga xuta xi tsajin mé cumá rê me hane ngajñi rê xuta vë ne, cuetju xuta tjê rê David xi cuma me xuta matitjun ngu xatsë nga nixtin hya. Hya ne, cuya cuiyuju yějê xuta tjê rê Israel nguehe nangui rê me. Nguehe ndaja cuatjun me. Hane tsajin ngu nixtin nga xi cuya cuaxë me tsëhë nangui rê me.

Uzías ne, vitexa me nangui Judá

(2 Reyes 15:1-7; 2 Crónicas 26)

Ngu yějě rě xi Jeroboam xi majo ne vitexa me nangui Israel ne, Uzías, quihndi rě Amazías, camá me xuta matitjun tsěhě nangui Judá. Hane Uzías ne, casahmi me gobiernu nangui Judá xcun yachan tejo nu hacuaha ndaja cavitexa me. Hya xi camá me xuta matitjun ne, chihndě sa me, hane ndaja cahndě me tsěhě Nina. Hane Nina ne, cavisecoo me me xi caca rě me xcun jemu cjin si. Hya ne, caviyuju hñu me ngahñu rě nandya xi siu nangui Judá. Peru hya xi cama changa me, hacuaha cama nchina me, hacuaha tjin ngahñu cjua rě me ne, casahmi jyě me yojo rě me. Hane ngu nixtin ne, casahmi me ngu cjuangarca. Hya ne, cavejñacacun me xi tjin rě me derechu xi cuisehen suva me cahntsua yungun rě Nina hane cuaca me tyjungunsa. Nahmi xi siu ngajan ne, miji sua me cahndě ta catsinguitsjen me xi suva xuta tjě rě Aáron xi má me nahmi cuma cuaca me tyjungunsa jan. Peru Uzías, cavisinijiin me tsěhě me xi cuacun jan. Ha tu hora xi tisahmi me xa vě ne, hya casahmi Nina me castigu. Casatě rě yojo rě Uzías ngu chíhin cjan rě. Hya xi camá ne, cavanga cjin me cavetju me tsěhě yungun hane tsajin

nixtin xi casacu cavisehen me ngajan xcun cjuahñu rē me ta camajin camandaja chíhin vëhë, hane ley rē Nina chja xi xuta xi ma rē me chíhin vëhë ne, cumajin cuisehen me yungun. Hacuaha camajin cjuenduju me sacuaha xuta matitjun. Vëhë xi quihndi rē me xi hmi rē Jotam ne, camá me xuta matitjun.

Profeta Oseas ne, chja me cjua rē Nina cojo xuta tsëhë nangui Judá hacuaha cojo xuta tsëhë nangui Israel

(Oseas 1-14)

Nixtin xi Jeroboam xi majo má me xuta matitjun tsëhë nangui Israel hane hacuaha Uzías ne, má me xuta matitjun tsëhë nangui Judá ne, hya ne, catsingatju Nina profeta Oseas xi cuichja me cjua rē Nina cojo xuta catsijo nangui vë. Oseas ne, jemu cjín nu caca rē me xi casahmi me xa rē profeta ta, caca rē me hisca hya xi cavitexa Ezequías, quihndindai cjín rē Uzías.

Nina ne, cavitexa me Oseas xi cuixan me cojo ngu chjuun xi ha jercu cjín camá xihin rē na. Cuatjin cavitexa Nina me ta cuatjin tsingacun me xuta tjë rē Israel xi tangun me cojo chjuun tsehen jan.



Tangun me ta sacuaha xcusun rē chjuun tsehen jan xi manguaain rē na cojo ngu xihin ne, cuatjin xcusun rē me ta manguaain rē me cojo ngu Nina. Hane xi cavixan Oseas cojo chjuun jan ne, casacu rē na ngu quihndi. Hane Nina ne, cachja me cojo Oseas xi quihndi jan ne, cjuaha cha ñihi rē nandya Jezreel. Cachja me xi quihndi jan ne, tsiquehneya rē xuta rē nima Jehú, me xi nchava changá rē Jeroboam xi majo, ta nima jan ne, jercu catsiquehen xuta ngajan nandya Jezreel. Hacuaha ngatsē rē quihndi jan ne, cuetsun xu gobiernu rē nangui Israel. Hane cavatju sa nixtin hane sehe na chjuun rē Oseas ne, casacu rē na ngu quihndi chjuun. Hane Nina ne, cachja me xi

cumá hmi rē na Tsajin-cjuahmutacun, ta quihndē miji rē Nina xuta rē me. Sehe na chjuun jan ne, casacu nga rē na ngu quihndi xihin. Hane Nina ne, cachja me cojo Oseas xi cumá hmi rē cha Hacuini-xuta-naha. Cuatjin hmi rē cha ta tsēhē xi xuta nangui Israel ne, ha quihndē cachaja me cahndē rē me sacuaha xuta xi cavaxijin Nina xi cuma me xuta rē me. Cuatjin cachjataha Nina xuta, peru hacuaha cachja me cuitjin:



—Cuechu ngu nixtin xi xuta tjë rë Israel ne, cumá me ngu xuta cjín camahani. Hane xuta cjín jan ne, quihndi rë Nina xi quicun jain ne, cuatjin cuma hmi rë me. Nixtin hya ne, cuma tangun gobiernu rë xuta nangui Judá cojo gobiernu rë xuta nangui Israel. Hacuaha ngu me xi matitjun ne, cuitexa me yějë ni me hane cuma jyë hnga me.

Sehe cachja Nina cojo Oseas xi sua me ngu cjuañihi xuta nangui Israel ta tsëhë xi cahndë xi cjuaharcun me Nina ne, tu nina ndacha faharcun me. Cachja Nina cojo Oseas ta tangun xcusun vëhë cojo xcusun rë ngu chjuun xi tsismicacun na xihin rë na, handasa cha vëhë ne, ndaja sahmi cha cojo rë na. Na vëhë ne, fi tjengui na hacjahi sa xihin xi cjuaña na cojo. Hane hisca ma savaain rë na xi cuatjin sahmi na. Hane hacuanitjin má xcusun rë xuta nangui Israel. Peru cachja Nina xi cuechu nixtin ha quihndë suaain me cjuañihi cojo xuta jan, hane cahndë rë vëhë ne, sahmi me xi ndaja cuatju me. Nixtin hya ne, me xi cuacun vë ne, ngu ni Nina cjuaharcun me, hane quihndë cuyaaín cjuaharcun me nina ndacha.

Hya xi camá ne, Nina ne, cavitexa me Oseas xi cjue jaha me chjuun rë me canduva me cojo na ndava me. Cachja me xi handasa

xi cafaña na cojo hacjahi xihin, cuatjin sahmi me hane cjuahatsja nga me na cojo cjuahmutacun. Hane xi cuatjin sahmi Oseas cojo chjuun rë me ne, tsingacun me xi Nina ne, meje rë me xuta nangui Israel handasa xi quijitjengui me cjuachacun rë nina ndacha. Hane casahmi Oseas sacuaha cachja Nina. Sehe cavejñañihi me chjuun rë me cahntsua ndava me cojo sa xi cumajin tsujyihya na tujyë ni, peru hacuaha cavatjuñihi me cojo na. Cuatjin casahmi me sacuaha ngu seña xi cuechu ngu nixtin jyë xi xuta nangui Israel ne, tsajin rë me ngu xihin xi cuitexa me. Hacuaha hya ne, cumajin cjuecojo me cjuatjo rë Nina, hacuaha tsajin rë me cahndë rcun nixtin hya. Cuatjin cuatjun me hya xi chaja sa cuechu nixtin xi cuya cjuaharcun me Yahvé.

Sehe Oseas catsinguitsjen rë me xuta yëjë ni xcusun xi casahmi me xi cachuyiin rë Nina tsëhë. Cuitjin cachja me:

—Nina ne, tsicanijjyë me yun jercu cjín xcusun tsehen. Chja me ta ngayun ne, nihñuachuun cjua nuju. Ngayun ne, xuta tsiquehen yun, hacuaha xuta chëjë yun. Ngayun ne, nihñu cjuatsehen cojo chjuun rë hacjahi xihin. Vëhë xi nangui xitjë nuju ne, cumá nangui

quixí. Ngajñi nuju ne, sacu yo xi má xu nahmi o xi má xu profeta, peru sá nahmi o sá profeta ne, fahacuendaaín me cjua rē Nina. Cuicuyaain me xuta cjua rē Nina hane sahmichiin me suva me cjua an. Ngu tangun ni chjuhuncun nina xi ya camá hane ngajan ngasunscun rē ne, tsjuñu cojo rē yachjin xi siuxa rē. Vēhē xi ngu tangun ni satē nuju castigu. Hisca cojo nangui Judá ne, hacuaha tijima xcusun tsehen vē, hane hacuaha cuma me castigu. Ngayun, canihñu yehe sá jyē nuju ta hya xi tjin nuju ngu cjuacjintacun ne, hacuiin Nina canújun cojo xi cuisecoo me yun ta canújunyun cojo me xi matitjun tsēhē Asiria xi cuisecoo me yun. Cjua vē ne, Nina cachja me cojo ná.

Hacuaha cachja Oseas cjua vi cojo xuta:

—Mameje rē xi cuinújan cojo Nina xi jemu choho ma naja ta tjin xi cun naja ta canihña jain cjuatsehen vē. Mameje rē xi chjahyan rē me xi tsingacun me yaan hacutjin cuyan cuiseen ndiya rē me. Chahyan rē me xi sua nga naja me ngahñu cjua naja hane cuya xi ndaja cuatjun.

Sehe cachja Oseas cuitjin:

—Nina ne, cuitjin cachja me cojo ná: “Xcusun rē xuta nangui Israel cojo xuta nangui Judá ne, caain rē me cjuaharcun ná cjin nixtin. Sacuaha hora xi caa rē xuñu nguitajñu ne, cuatjin hora xi caa rē me cjuaharcun ná me. Ngahan, meje ná xi cjuaharcun ná me cojo nguñaja cacun me hacuaha scuëë me xcusun naha. Vëhë xi catsingátju rē me profeta xi cuichjataha rē me. Peru xi má rē xuta vë ne, cuijnecácun hane tsinguijnehnchan me cjuacjan naha sá xi jemu cjin chu tsiquehen me sacuaha cjuatjo naha. ¡Quixiin vëhë! Ngahan, meje ná xi cjuaharcun ná me cojo nguñaja cacun me hacuaha scuëë me xcusun naha. Meje sahme xi ndaja cuatju xuta nangui Israel, peru cumajin sahme ta jemu choho sahmi me. Xi má rē me ne, matsijin xcusun rē me, peru tsejen ná hane tsingátju rē me castigu. Sacuaha xuta matitjun rē me ne, chuva ngu chuva ngu fahaxen me, peru me xatsë xi visehen me ne, tangun ni sahmi me xi hndiin me. Hane hya xi nduva condra rē me ne, fehya me ngahñu cjua rē xuta xi faharcun nina ndacha. Tsejen xi ngarca ni sahmi me. Jemu jñu rcu me, vëhë xi hya xi matangun me cojo xicjin me ne, cuma cjuaha me sacuaha ngu changa xi ma faha nisë cjin.

'Cachja sa Nina cuitjin: "Jemu xti ma ná xi faharcun xuta nangui Israel jo hndindyaja vē tsēhē oro xi casahmi me. ¿Hacutjin chja me xi nina má vē? Quixiin xi chja me ta majin tsindaja xuta Nina. Vihndiin me xi cachjá cojo me, hane faharcu me tu mé ni nina ndacha xcun ngasunscun xi casahmi me. Vēhē xi tsingátju ngu sindadu cjín rē ngu nangui cjín xi sua rē me cjuañihi. Sindadu cjín jan ne, caa rē me xcun si, sehe cjuecojo me me nangui cjín jan. Hane quihndi rē me ne, tsiquehen me me. Cuatjin cumá cjuañihi xi cuatju me." —Cuatjin cachja Oseas cojo xuta.

Ngu ndiya nga ne, cachja Oseas cuitjin:

—Cuitjin chja Nina: "Ngayun ne, nguyējē rē xi tisacu hñu nuju ne, nihñu ngahñu xi ndacun cuma ngasunscun hiscan chjuhuncun nina ndacha. Vēhē xi cun nuju hane cuma nuju cjuañihi. Tivechu nixtin xi sindadu cjín tsēhē Asiria ne, cuinduva me. Cjuaha me hndindyaja rē oro jan hane cjuecani me vē hiscan hinchandaja cjuanchina rē xuta matitjun rē me. Hane me vēhē ne, hacuaha cjuecani me yun nangui rē me. Sacuaha ngasunscun xi canihñu ne, tsinguetsun me yējē ni. Hya ne, tsajin yo cjue



cjuaharcun me ngajan, hane cumacha nahya sehe setsa rë yějě. Hitsě sa ndaja sá xi ndaja nihñu, sá xi quixi cjuatacun nuju. Xi cuatjin ne, sahme xi ndaja cuatjun. Nihñu oración nuju sehe tsingácun nuju cjuandaja naha. Nihñu xcusun ndajyihi xi ndama ná cojo hane tsixunga cjuandaja naha sacuahaxunga naxu hya xi vaha tsi. Peru ngayun ne, hitsě sa macjain nuju tsěhě sindadu cjín nuju xi cuma ná ngahan. Věhě xi satě nuju xi jercu cjín si sahmi xuta cjín cojo nuju hane nichujun xcun si jan. —Cuatjin cachja Oseas cjua rë Nina.

Sehe cachja nga me cuitjin:

—Cuitjin chja Nina: “Hya xi casuandya xutachanga nuju tsëhë cjuañihi xi má me mosu hndixahan ngajan nangui Egipto, casahme xi jercu ndaja cavatju me. Sacuaha sahmi ngu nahmi cojo quihndi rë me xi tsicjen me hacuaha tsingacun rë me hacutjin cjue, cuatjin casahme cojo rë me. Peru ngayun ne, nihñu cojo ná sacuaha ngu quihndi hngacacun. Vëhë xi cuyun cuiyujun nangui Egipto, cjuecojo me yun nangui Asiria. Handasa suá cahndë xi cuatjin cuatjun peru hmucácun cuaha nuju, hane sahmeë xi cjuëya tjë nuju xcun cjuañihi vë. Cuechu nixtin xi suá cahndë xi cuya xuta nuju nangui nuju. Peru meje rë xi cuyun chjuhuncun ná, meje rë xi ndaja yun, meje rë xi quixi yun cojo cjua nuju hane tuhun rë xuta hacutjin satë jain rë me. Xutachanga nuju, hya xi jemu tjin rë me cjuachaja ngajan Egipto, hya xi mosu hndixahan má me ne, camanga rë me cojo ná hane cafaharcun ná me. Peru hya xi casacu nuju xi meje nuju ne, camá nchina yun hacuaha camá xta yun hane canismutacun ná. Vëhë xi suá cahndë xi xuta condra nuju ne, sua nuju me cjuañihi. Hane nandya Samaria, nandya rcun nuju ne, cuejña cuatjin. Peru cuechu nixtin xi cjuaveya ne, quihndë tsajin

camahani mé xi cuma sahmi cojo nuju ta cuechjë chji rë xuta naha.
 Hya ne, cjuaveya ne, ha quihndë tsajin camahani mé cjuahngatacun
 xi cuma sahmi cojo xuta naha.

Sehe quijinduju cachja Oseas cuitjin:

—Ngayun xuta nangui Israel ne, cuyun chjuhunrcun Nina.
 Cuijacun jyë nuju cojo me. Nújun cojo me xi quihndë cuyuun
 chjuhunrcun nina ndacha. Cuatjin meje rë xi nújun. Cuitjin cachja
 Nina cojo nuju: “Cuechu nixtin xi sahme xi cjuë xi jñu rcu xuta
 nangui Israel hane cuya cjue xcun me. Hya cojo nixtin xi cjuiniji sa
 ne, cuyaain cjuaharcun me nina ndacha.” Cuatjin cachja Nina.
 Vëhë xi sá xi quicuntacun ngayun, tetuhunrcun yëjë xi tichjá cojo
 nuju. Ndiya rë Nina ne, yëjë ni nixtin ne, ndaja. Xuta xi tyjahi
 cjuatacun rë me ne, sahmi me sacuaha vitexa me, hane ndaja vatju
 me má. Cuma tangun me cojo xuta xi tsujyihya me ngu ndiya xi
 ndaja chichihin hacuaha quixi. Peru xuta tsehen ne, jemu tjin
 xcusun xi xtenguiya rë me xi meje tsujyihya me ndiya vë.

